

海

國

圖

志

海國圖志卷二十一

邵陽魏源重輯

中印度各國

西域聞見錄溫都斯坦亦西域回國之大者也葉爾羌西南馬行六十餘日至克食米爾克食米爾復西南行四十餘日至溫都斯坦水亦可通兩地貿易之人多資舟楫往來不絕稱其王曰汗其都城雄壯周圍六十餘里轄大小回城三百七十餘其人深目高鼻多鬚目睛黑白光如琉璃面黑唇青言語類鳥鳴回子亦不能辨

衣敝前襟頭纏花布厥土黑墳地極濱暑瘴痼爲害人
有頭面生贊疣引之而長放之而縮者地以象耕服車
致遠皆取給於象有牛馬無駝羊驃驢不解游牧之事
粳糯秔稻及瓜果蔬菜靡不繁植檳榔桃榔櫻橘柚
在在成林冬不凋葉人習技巧金漆雕鏤制作精奇所
製玉器薄如蟬翼文成如髮抽金銀爲絲織綢緞瓊布
遍貨於西域各國及各回城所居穴地深數丈旁掘土
洞爲室室亦絕精飾以金玉從無地土起屋並園亭之
事其城村似曠邈無人煙處也郭外大澤一山水秀麗

花木蔚然居人多攜眷乘舟累月經旬游於其內多美
釀尚宴會必費數百金亦多載酒泛舟於澤中者凡其
地之公私事務及一切農工商旅操作交易皆於夜間
爲之日出則伏國旣富庶風俗奢靡其地亦有玉山獨
少白金價過黃金也最貴中國磁器或有攜至其國者
爭以白玉盤碗交易而去惟恐失之而大黃尤爲至寶
以黃金數十倍兌換蓋其地之一切疾病瘡瘍得大黃
卽愈百不失一貴客來及大筵宴皆以大黃代茶人若
經年不服大黃則必死故雖貧苦小回亦必有一半兩

大黃囊胸前舌舐而鼻嗅之其地之江河皆通海洋時
有閩東海航到彼停泊多有以大黃漁利者兩廣福建
之物往往有之或重販至葉爾羌轉入中國矣哈什噶
爾回子買得漳絨一端上有天順字號固閩貨也其國
西隅有巨澤圍數千里澤中有山圍踰千里萬峰聳峙
高入雲天或曰人間第一高山也名曰牽各里麻膽達
喇斯山中產獅子于秋月皎潔輒負雛于山中往來頭
大而毛虬尾形如帚黃質黑章如虎皮長六七丈時登
山絕頂望月垂涎咆哮跳擲猛飛吞月有飛去八九里

十餘里而墜死山谷中者其國人以豢養獅子爲上戶每當秋月其汗使人取獅以金鐵作柱大如甕密布層遮圍畜之於其中飼以牛時而吼如雷霆滿城震動人畜不寧椿園氏曰乾隆四十年有溫都斯坦之海門達爾遊至回疆予晤其人面黑唇青睛如琉璃據云彼乃其地之白皙者耳又云其國之西南數萬里有黑白之人白者如雪黑者如漆國在大海之中得毋卽東粵之所謂黑鬼白鬼者歟因細談其地之事甚詳與予向所聞無異而率各里麻膳搭拉斯之山高聳至極靈蹟最

著其卽古人所謂日繞之峯歟顧山雖至高無出沒日

月之理四圍皆水舟楫可通亦無所謂弱水焉

案溫都

都一作興都卽印度身毒之轉音也坤輿圖職方圖皆作莫臥爾國蓋中印度也其西北大澤卽所謂裏海也

裏海中高山而疑其地暑而多瘴多雨類閩廣水土惡爲須彌陋不足辨其地繁而殷富惜乎象胥通劣之鄉而山有寶地生毛故人繁而殷富惜乎象胥通言不能盡解其說所得考核存據者亦僅參半焉爾

萬國地理全圖集曰亞加者古時中印度之省會係蒙古印度王之都殿宇官衙光耀燦輝形勢在北極出地二十七度十一分偏東七十七度五十三分有塔建在

平坦周視九十里所有居民大半崇回教並不崇拜
菩薩其廟內無偶像並無燒香惟念經叩頭而已回
教門之人數百萬在五印度各處居住昔蒙古軍侵國
強令土人棄絕佛像否則誅死故此印度多奉其教至
今不絕其近城有古王之墓高如疊塔一周幾十丈煥
然齊整其礮臺四面險固此際鄰國咸竊毫無戰釁故
生意復興道光十三年以此地爲都會又亞北得希者
古回回王之京明嘉靖五年蒙古汗乘機侵奪創立大
國歷二百三十五年令五印度列國進貢乃佞臣結黨

變詐蜂出乾隆二十五年王懦無能投降英人蒙其俸祿安居本都但戰鬪不息爲敵國侵據于是英官征逆靖國宣威回回王現時駐官無權惟享虛榮受英俸祿足以養宗室而已其都廣大其殿遼闊其民各服英權歷年泰平

東印度各國

海錄烏土國在暹羅蓬牙西北疆域較暹羅更大由蓬牙陸路行四五日水路順風約二日到佗亞爲烏土屬邑廣州人有客於此者又北行百餘里到媚麗居又西

北行二百餘里到營工又西行二百餘里到備姑俱烏
土屬邑王都在益晝由備姑入內河內河卽恒河會
大金沙江海口水

行約四十日方至國都有城郭宮室備姑鄉中有孔明
城周圍皆女牆參伍錯綜莫知其數相傳爲武侯南征
時所築入者往往迷路不知所出云北境與雲南緬甸
接壤雲南人多在此貿易衣服飲食大約與暹羅同而
樸實仁厚獨有太古風民居多板屋夜不閉戶無盜賊
爭鬪國法極寬有過犯者罰之而已重則圈禁旬日而
釋無殺戮撲楚之刑實南洋中樂國也男女俱椎髻婚

嫗峯同中國死葬於山不封不樹土產玉寶石銀燕窩魚翅犀角泥油紫景兒茶寶石藍者爲貴以其難得也泥油出土中可以燃燈紫景亦土中所出可代印色自安南至此及南洋諸國沿海俱有鱷魚形如壁虎嗜食人土番有被鱷吞者延番僧咒之垂釣于海食人者卽吞鈎而出其餘則不可得也由備姑西北行沿海數千里重山複嶺并無居人奇禽怪獸出沒號叫崇巖峭壁間多古木奇花所未經覩舟行約半月方盡亦海外奇觀也○徹第岡在烏土國大山之北數十年來英吉利

新闢之地未有商賈其風俗土產未詳案此皆印度之東境卽古柯枝國也

又曰明呀喇卽孟加臘英吉利所轄地周圍數千里西南諸番一大都會也在徹第岡海西岸由徹第岡渡海順東南風約二日夜可到陸路則初沿海北行至海角轉西又南行然後可至爲日較遲故來往都由海道其港口名葛支里港外沿海千餘里海水渾濁淺深叵測外國船至此不能遽進必先鳴礮使土番聞之請於英吉利命熟水道者操小舟到船爲之指示然後可土番亦必

預度其深淺以泡志之泡者截大木數尺製爲櫬形空其中繫之以繩墜之以鐵隨水道曲折浮之水面以爲之志土番謂之泡每一望遠及轉折處則置一泡然外人終不能測是殆天險也港口有礮臺進入內港行二日許到交牙礮臺又三四日到古里噶達英吉利官軍鎮明呀喇者治此有小城城內唯住官軍商民環處城外英吉利官吏及富商家屬俱住漲浪居漲浪居者城外地名也樓閣連雲圓亭綺布甲於一國英吉利居此者萬餘人又有敘跋兵五六萬卽明呀里土番也曾長

有三其大者曰卽攸士第其次曰尼里又次曰集景皆
命于其王數年則代國有大政大訟大獄必三人會議
小事則聽屬吏處分其統屬文武總理糧餉一人謂之
辣亦數年而代其出入儀仗較三酋長特甚前有騎士
六人後有四人左右各一人俱穿大紅衣左右二人裝
束俱同辣唯辣所穿衣當胸繡八卦文爲異耳凡鞫訟
上下俱青衣唯三酋長兩肩有白絨緣頭戴白帽酋長
上坐客長十人旁坐客長客商之長也每會鞫必延客
長十人旁坐欲與眾共之也其獄必僉曰是然後定讞

有一不合則復鞠雖再三不以爲煩然怙奢尚利賄賂
公行徒事文飾無財不可以爲說也其土番有數種一
明呀里一夏里一巴藍美明呀里種較多而巴藍美種
特富厚明呀里食牛不食豕夏里食豕不食牛巴藍美
則俱不食富者衣食居處頗似英吉利以華麗相尚貧
者家居俱裸體以小幅布圍其腰臍以掩下體男女皆
然謂之水幔無來由番亦多如此有吉慶則穿長衣窄
袖其長曳地用白布二丈纏其頭以油徧塗其身所居
屋盡塗以牛糞交易以文螺壳爲貨貝娶妻皆童養夫

死鬚髮而居各種不相爲婚男子胸蓋數小印額刺紋
女皆穿鼻帶環巴藍美死則葬于土餘俱棄諸水明呀
里間有以火化者更有伉儷敦篤夫死躍入火中以殉
者自此以西地氣漸寒中國人居此者可穿夾衣非若
東南洋諸國四時俱單衣也土產鴉片煙硝牛黃白糖
棉花海參琥珀詞子檀香鴉片有二種一爲公班皮色
黑最上一名巴第古喇皮色赤稍次之皆中華人所謂
烏土也出於明呀喇屬邑地名巴旦拏其出曼達喇薩
者亦有二種一名金花紅爲上一名油紅次之出馬喇

他及盎几里者爲紅皮出孟買及卽杜者則爲白皮近時入中華最多其木似櫻粟葉如靛青子如茄每根僅結子二三顆熟時夜以刀微劃其皮膏液流出凌晨收之而浸諸水數刻然後取出以物盛之再取其葉曝乾末之雜揉其中視葉末多少以定其成色葉末半則得膏半然後捏爲團以葉裹之子出膏盡則拔其根次年再種案明呀喇海國聞見錄作珉呀或人又作孟阿拉或作孟加臘實皆一地

海國聞見錄小白頭國東鄰珉呀國一作明呀喇卽今孟加臘也珉

呀人黑穿着皆白類似白頭英機黎荷蘭佛蘭西聚此

貿易珉呀天竺佛國也珉呀之東南遠及暹羅珉呀之
南臨海珉呀之北接刺麻西藏及賽馬爾丹國屬

粵商回述孟阿拉地宜種植百物叢生終歲南風並無
冬夏每洋銀一圓值彼處銅錢一百文白米一升值彼
處銅錢一文其鴉片煙四季種收周流不息各國夷人
均向彼處收買每公土一件價銀一圓白土一包價銀
六錢國土所抽稅每土一件約銀二圓運至中國每碼
土計成本銀四圓有奇從前可賣至八九圓聞去年中
國禁令森嚴彼處夷發售甚艱價亦太賤每船煙土所

售銀兩僅敷來往盤費所獲既無大利各夷均不願作此鴉片生理本年夏間由彼處起程聞英吉利國王以中國嚴禁有傳令停止製造之說

萬國地理全圖集曰榜葛刺國東印度也海口河流疏派田畝豐盛物產如山如糖硝棉花鴉片毓餅胡絲五穀等貨其省會曰甲谷他在安額河之濱於北極二十度二十三分偏東八十八度二十八分天下互市之處康熙七年英商始建市館築小礮臺屋宇僅七十間乾隆十七年土君擅壞其房囚其人當時英官報仇用

兵驅逐虐主總歸其管轄焉都邑廣大居屋如殿其街
直而廣兩面高樓粉白如雪內有學校文院各等文藝
之館男女讀書務學勉爲良善全印度之總帥劄駐甲
谷他管下英國軍士三萬丁土軍二十三萬丁文官俱
幼時來自英國學習土話自上升擢俸祿甚厚以理地
方各事所建礮臺四圍廣大敵軍斷難取據深溝高壘
金城湯池四面險固水路可通內地各大邑若水淺流
急用火輪船牽其河舟不待風潮上下不絕城內財帛
不勝數凡他省及內地富商皆雲赴甲城以包兌包送

○甲部東勢他加城居民二萬丁百姓立機房造織細
紗布帛昔總帥劄駐之省會此時惟見頽牆壞壁○甲

部之西八拏邑居民稠密造硝種罂粟青黛田種玫瑰
酴醿摘花葉造花露居民好香撲鼻常用以調飯洗身

○甲部西南北拏力邑印度教門中著名之區謂是地

之中心街衢甚窄房屋瓦造高五六層眾生奔馳如影
不絕居民計六十萬丁據印度人說菩薩造成其城以
爲聖處信其教者詣邑燒香奉拜偶像以免地獄之罪
又言沐浴其河內者諸罪一概洗滌直上天堂此印度

佛教中之恆河也東印度之東爲緬甸北印度之東爲廓爾喀及西刻等國此數國皆近西藏貢於中國近日西刻及廓爾亦爲英吉利駐印度之兵所攻服故東印度孟加臘已與西藏通互市惟北印度與鄂羅斯國游牧部相接壤至今爭戰未息蓋鄂羅斯亦貪印度鴉片之利爾

魏源西藏後記曰滇南師範有言中國赴于竺佛國亦有兩道一自雲南騰越州而南至緬甸城轉西以至東天竺凡三千五百里再至中天竺又千有一百里共五

千有百里一百雲南麗江而距進藏至中天竺北界二
千里又千有六百里而至中天竺僅三千有二百里視
南道經千有九百里以地望准之雲南之騰越州正與
天竺東南相值止因其間亦髮野人隔之故一則迂道
南行千有七百里至緬甸然後轉西至東天竺又西北
至中天竺檀那國計三千八百里一則迂道西行入藏
然後轉南亦至檀那計三千二百里使能取道野人逕
直西上則色田緬由藏兩迂道而自騰越達天竺不過
千有九百里野夷若入版圖則與天竺境壤相接昔漢

武開西南夷欲由梁州達大夏偉矣哉西藏記曰由後藏塞爾地方西南十八程至宗里又八日至白木戎部落其地北接後藏西接白布南至小西天北界至小西天界南行十日至其國都布爾牙部落始上海船行半月至大西天小西天爲東天竺大西天爲中天竺又曰後藏札什倫布西南與布魯克及白布等部交界白布卽贊普取白布國王女之地布魯克卽往天竺之路也又一路由阿里西南二千餘里入厄納特珂克卽中天竺其中藏前藏東南則以怒江爲界江以南卽猶猶野

人每藏中有死罪則驅之過江聽野人殮之以上西
藏記然

則怒江南岸逾野夷西境卽布魯克部與東天竺近而怒夷自雍正中內附歲輸皮貢於騰越界非不可闢之區則天竺與中國亦非不可接之境惟是東天竺卽今南洋孟加臘地久爲西洋英吉利所據專產鴉片煙流毒中國誠能募騰越士勇萬人渡江而西南長驅擣其背腋通絕域爲鄰壤實制西夷之一奇或曰大金沙江自藏經緬其入海之口卽東天竺界其水關於大江造舟藏地順流建瓴尤倍捷于陸然有舟師之便而又有

緬夷之梗利害亦適相當也

又乾隆征廓爾喀記四川雲南之西爲烏斯藏烏斯藏之西南爲廓爾喀廓爾喀之西南爲五印度印度古佛國在葱嶺西南瀕大海去烏斯藏尙遠或以烏斯藏卽古佛國者非也自四川打箭爐西行二十餘驛至前藏四十二驛至中藏又十二驛至後藏又十二驛至濟隴又三十驛至石宿堡爲後藏極邊地踰橋而西則廓爾喀矣廓爾喀本巴勒布國舊分葉楞部布顏部庫木部于雍正九年各奉金葉表文貢方物後三部并吞爲一

遂與後藏鄰自古不通中國其與中國構兵則自乾隆五十五年內犯西藏始初後藏班禪刺麻以四十六年來朝祝_拜高宗允旬假中外施舍海溢山積及班禪至_于京師資送歸藏其財皆爲兄仲巴呼圖克圖所有旣不布施各寺廟與唐古特之兵又撥其弟舍瑪爾巴爲紅教不使分惠于是舍瑪爾巴憤懣廓爾喀藉商稅增額食鹽株土爲詞興兵闖邊唐古特兵不能禦而朝廷所遣援剿之侍衛巴忠將軍鄂輝成德等復調兵賄和陰令西藏堪布等私許歲幣萬五千金接

兵不戰，遽以賊蹙乞降飾奏而諷廓爾喀酋入貢受封。國王廓爾喀既侮藐內地，次二藏中歲幣復爽約。于是廓爾喀以責負爲名，再舉深入，後藏札什倫布西南左有曲多江，輦右有彭錯嶺，峭壁連岡，咽喉天險。賊步卒數千自聶拉木入，其時蕃漢官兵苦分兩路，一扼曲多江，輦遏其前，一繞赴彭錯嶺截其後，則廓爾喀深入無援，可不戰潰也。駐藏大臣保泰一聞賊至，則移班禪于前藏，并請移達賴班禪于西寧，欲以藏地委賊，且札什倫布地負山面江，形勢聳峻，刺麻數千乘墉可守，以待

援而仲巴呼圖克圖挈資先逸刺麻濟仲札蒼等復託言卜諸吉祥天母不宜戰眾遂潰賊大掠札什倫布全藏大震爾大喇麻飛章告急侍衛巴忠扈 駕熱河

聞變畏罪自沉水死時鄂輝爲四川總督成德爲四川將軍因盡以罪委之謂巴忠解唐古特語故私議皆其一人所爲已二人不知也及奉命赴藏剿禦又按程緩進 上知二人不足恃乃 命嘉勇公福康安爲

將軍超勇公海蘭察參贊調索倫滿兵及屯練土兵進討其軍餉則藏以東川督孫士毅主之藏以西駐藏大

臣和琳主之濟隴邊外則前川督惠齡主之賊狃于上年賄和之役半運所掠歸國半屯界不去鄂輝成德等遂奏賊退欲卽以歲事上切責不許明年二月將

軍參贊由青海至後藏四月連敗其屯界之賊盡復藏地六月遂大舉深入恐賊繞襲後路遣領隊大臣成德岱森保及總兵諸神保各出左右一路以分賊勢而大軍出中路海蘭察將三隊爲前軍福康安將二隊繼之賊據木古拉山阻水拒險將軍議令護軍統領台斐英阿與賊相持而大軍別趨間道海蘭察統山後出賊營

之上福康安由間道合衝賊營克其木柵石卡數十追奔至雍野雅而成德諸神保亦克鐵索橋進會利底廓夷舉國震懾遣使詣軍前乞降將軍參贊嚴檄斥之七月再進六戰六捷殺賊四千涉賊境七百餘里將近其國都陽布之地隔河大山賊以十營踞山嚴守水深山斗絕山後卽其國都也福康安欲逾橋攻之海蘭察力持不可福康安自引兵渡橋仰攻果不利賴海蘭察接應退賊方是時其國境南鄰印度之地久爲英吉利屬國與廓夷積釁聞廓夷受兵於中國則亦出兵攻其邊

鄙廓夷兩支强大敵，洶懼無計，且恐我軍聞而氣奮也。
再遣人詣軍，卑詞哀乞，將軍參贊議以賊境益險，而踰
八月卽大雪封山，不可老師，乃允其降，盡獻還所掠藏
中財寶，及塔頂金冊印，歸前被執之丹津班珠爾等，并
獻沙瑪爾巴之戶，貢馴象番馬工樂，請永遵約束，班師。
上本欲俟事平，裂其土授諸土司，而酬福康安以
郡王爵，及聞已受降，乃允其請，留番兵三千，漢蒙古兵
一千，戍藏，是爲官兵駐藏之始。後藏至廓爾喀，故有孔
道，賊嚴守之，故我師覓間道入其峒絕處，左壁右湍，不

容一騎將軍參贊亦時步進，故所貢象竟不能達，而烏拉嶺上下百二十里必窮一日之力踰之，稍昏黑卽不能覓路，且有雪城若門洞深數十丈人往來者不敢語，否輒有雪大如屋壓而殛之，廓爾喀寇藏時，運賈歸國者三千人過嶺凍死殆盡，蓋葱嶺之南脊天所以限中國也，險倍金川遠踰回部爲漢唐兵力所未至，幸其士卒皆跣足，每戰仿古法先約期而後交綏，我軍不顧輒先發掩襲，往往猝爲我乘，自大創以後至今貢獻不絕，其國西南與五印度相鄰，其南海號印度海，近日印度

之孟加臘及孟買等國爲西洋英吉利所據乾隆六年英吉利使臣入貢自言前歲大將軍率兵至西藏西南之的密部落時彼國兵船亦曾相助倘嗣後有需用西洋兵者情願効力朝廷始知前此廓爾喀之役其南界亦有邊警外患也道光二十年英吉利夷人入寇粵浙廓爾喀亦遣人稟駐藏大臣言小國與里底所屬披楞相鄰每受其侮今聞里底與京屬構兵京屬屢勝臣願率所部往攻底里屬地以助天討時駐藏大臣未知所稱里底卽英吉利所稱京屬卽謂中國之廣東

省所稱披楞屬地卽印度答以蠻觸相攻
天朝向不過問郤之蓋英吉利國都雖遠在大西洋而其屬國印度則與廓爾喀接壤世仇構釁故我攻廓則英夷乘之我攻英則廓夷亦願助之云

臣源曰廓爾喀界西藏及東印度攝兩強敵之間然內貢中國而不貢印度夷近日英夷西與鄂羅斯構兵東與中國結釁故廓爾喀欲乘兩大國之勢以攻印度云印度地產鴉片煙英吉利關稅歲入千萬計其兵船入犯中國者十九皆孟加臘之人誠能聽廓夷出兵之請

獎其忠順擾彼腴疆擣其空虛牽其內顧使西夷失富強之業成狼狽之勢亦海內奇烈也鄂羅斯地袤二萬里與中國首尾相接地大兵强西洋所畏其與我互市之地則有陸而無海英夷之與我互市則又有海而無陸近日鄂羅斯屢與英夷爭韃靼里之地其地橫互南洋鄂羅斯得之則可以圖并印度故與英夷連年血戰雍正五年俄羅斯攻取西藏西南五千里之務曾木以地尙佛教遣人至中國學喇嘛當卽與廓爾喀相近若能許鄂羅斯海船赴粵貿易連絡彌利堅佛之地蘭西等國皆英夷仇敵則英夷之兵船不敢舍其境而

遠犯中國英人在印度大兵船止百艘以其半入寇中國其餘皆分守各境不敢遠離恐他國乘其虛也夫以夷攻夷之效咫尺者視爲迂圖乾隆嘉慶間一封暹羅遂足以西制緬甸東制安南善奕者或一聞著而全局皆生况以宅中馭外之勢制仇讐四結之夷哉

海國圖志卷二十一終

海國圖志卷二十二

邵陽魏源重輯

北印度各國

統志巴勒提在博洛爾南痕都斯坦東與之接境貢

道由回部漢唐罽賓近東地也

富爲唐西域記羣山近之畢迦試國

接中有長河有子伯特忙穆巴克什米爾諸地

分兩部落西長

默默帖爾及烏蘇完分統之各有眾八千餘人舊在葉爾羌貿易乾隆二十五年內附

西域見聞錄克什米爾回子一大國也

案宋史曰迦盧彌勒國元經世

地里圖曰乞石迷耳英夷地圖曰夾氏米里皆字異音同葉爾羌西南馬行六十餘

日可至其國中隔一冰山人畜至此須土人駝牽而過
其險甚於木素達板其人深目高鼻黃睛多鬚衣圓領
窄袖無髮辮飲食尤多禁忌禮拜尤虔語言強半可通
稱其君曰汗所屬回眾近百戶城池周三十餘里椿園
氏曰嘉峪關外多流沙間有水泉沙石兀突怪惡不生
草木至克什米爾以西以南時既清淑山川秀麗別有
天地矣而溫都斯坦各國極熱多雨無霜雪一切飛潛
動植與中國之閩廣無異豈以其近海之故歟人習工
巧製造詭異案此所云克仁彌爾之冰山卽唐元裝西域記北印度之大雪山也

皇清四裔考曰愛烏罕在巴達克山西南部落最大漢書西踰葱嶺有北道北道出大宛南道出大月氏此當爲大月氏地有三大城曰喀奔曰堪達哈爾曰默沙特喀奔城南北西面山東面平曠堪達哈爾城四面俱山其汗愛哈默特沙居之默沙特城舊屬伊蘭愛哈默特沙征取之統治三城事耕種無游牧勝兵十五萬軍器鳥槍腰刀之屬無弓矢善田作戶有餘糧少物采自兼容溫都斯坦部後資其金絲緞匹物力加豐亦有奄豎多取諸溫都斯坦商人不至其國乾隆二十四年大兵

逐霍集占將入愛烏罕境爲巴達克山僧素爾坦沙擒獻其屬下有奔愛烏罕者唆其興師問罪於巴達克山素爾坦沙憚遣使具言諸不得已狀愛哈默特沙云

大清國地廣人稠見於記載未知道路遠近今擬與爾部偕往投誠遂屢責焉突厥烏罕亦作阿布額尼亦作甲布爾所屬阿拉

克巴拉斯阿爾雜拜延舊隸伊闊由喀奔至堪達哈爾二十八程由堪達哈爾至默沙特二十程北接布哈爾西有默克札志爾等數部落中隔沙漠過此爲西海南有思布部落過思布亦海也案西海皆裏海非地中海也

地里備考曰阿附干國卽加布爾在亞細亞州之中印度之西北北極出地二十八度起至三十六度止經線自東五十七度起至七十度止東至塞哥國西連白爾西亞國南接北羅吉國北界達爾給國長三千二百餘里寬約二千里地面積方約十五萬二千七百餘里烟戶四兆二億口本國地勢東南西南平原坦闊其餘各方峻嶺重疊湖河甚少河之長者惟一名曰印度河又名心德河湖之大者有二一名盧克湖一名烏勒爾湖其田土西方則澆瘠過半沙漠無垠餘方則隴畝腴腴

穀果豐盛土產鐵錫磬鹽窯宅礦砂硫磺烟葉絲花阿
魏青黛丹參甘蔗地氈等物地氣互異冷熱俱極王位
相傳長幼皆得臨御諸臣公舉惟賢繼立所奉之教乃
回教也技藝庸陋貿易平常商賈負販結隊而行粵稽
本國來厯渺茫明武宗正德元年有巴卑爾者既獲加
布爾濟斯尼干達爾等處遂卽位稱汗厯傳二百餘載
康熙五十九年復取白爾西亞國歸於一統越十七載
白爾西亞國君那的爾沙興師擊逐反取本國迨薨後
本國復興自爲一國時君名亞美里沙乾隆四十五年

傳至塞曼沙者被弟馬慕篡逐以後綱紀敗壞國亂民變越十餘載塞哥國勞爾地酋長林日星者乘機侵占其兼攝諸地亦皆背叛惟阿付于西斯丹等處尙存現改九部一名加布爾乃本國都也建於平原之中街市繁華風景美麗一名羅各曼一名日刺拉巴一名合斯那一名西維一名干達合爾一名發來一名都札克一名伊隆達爾其通商衝繁之地曰加布爾曰干達合爾曰合斯那

案又名阿付顏尼卽愛烏罕之轉音也

外國史畧曰甲布國或曰押安國或曰加布額尼前屬
白西亞國及北路治北及西域游牧部東及五印度西
連白西國廣袤方圓萬六千里居民千四百萬多山谷
故氣候土產皆異在印度界內惟此地無深淵大河山
頂積雪不消而山內極熱地肥磽不一百姓稀少農夫
有五等每年二收多麥產油並阿魏多駝及綿羊犬善
走貓亦美鷹能捉鹿民樸實有仇必報百年不忘恥買
賣不肯家居以持械爭戰爲要務山峽甚多有外人入
之卽絕其歸路故敵國不敢侵而屢伐他國獲勝嘗據

五印度地後爲白西國所服降爲藩屬道光十七年俄羅斯國慾患其民畔白西復動干戈而白西國王率兵圍其北界之黑臘城於是甲布別立新主調兵以拒退白西國道光二十一年冬土民乘冬凍攻擊英兵英兵乏衣食多斃者次年英兵攻之仍令前王攝權地始安靜○其都曰加布額尼城甚堅固英人破之于他哈亦交界之城街廣而直城長而方民多甲布之族與白西國所屬之黑臘國交界其國君每駐此與白西國有隙地豐盛民壯健○哈薩克甲布兩地之間有地曰甲非

勒坦山地奉佛教與附近甲布之回人交戰族類甚多
地狹險多巖居出葡萄南果民美丰姿但未向化因在
巖內負固回族亦難侮之無王無君惟聽命於長老好
飲酒面白每將其女賣與回人爲奴最輕忽無信若非
山巖險固久爲他國降服矣

外國史畧曰北路治地南及印度地北連甲布東及英
藩屬地西連白西亞國廣袤方圓九千一百五十四里
居民二百七十萬地分五部曰撒拉文曰云他瓦曰以
哈拉文曰路士古地天氣殊異高峯夏亦雪積平地則

熱甚野長六十五里闊四十里東多山高者八百丈有
金銀銅錫鐵鉛等礦出絲花五穀青黛居民分兩族多
遊牧頗誠實喜接旅客亦有印度白西人其宗派各有
本會不相合駐其拉之地每年征餉二十五萬圓兵四
千有戰則召募民壯至三萬五千之多會進貢于申布
國此地形勢未經詳察

案俾路芝南濱印度海西北接巴社居愛烏罕之南
西恆河迤西也

地里備考曰黑拉德國又名東哥羅三在亞細亞州之

中印度之北北極出地三十三度起至三十六度止經
線自東五十八度起至六十五度止東南界阿付干國
西連白爾西亞國北接達爾給斯丹國長約一千五百
里寬約七百里地面積方約八萬里烟戶一兆五億口
地勢嶄嚴岡嶺絡繹湖河甚少田畝肥饒穀果豐稔草
木紛繁牲畜充牧土產鐵絲麻煙阿魏絲花香料藥材
鴉片等物地氣溫和王位世襲所奉之教乃回教也技
藝精良商賈輶輶通國分爲三部一名黑拉德乃國都
也建于平原之中昔甚富麗今稍凌替一名夏般一名

巴米昂

瀛環志畧曰阿富汗波斯東境明時裂波斯數城自立爲國前此固統於波斯別無名號也世多傳其兼并溫都斯坦今攷溫都斯坦乃五印度總名與阿富汗爲鄰者爲北印度之塞哥國兩國本以印度河爲界阿富汗嘗逾河而割塞歌之西境迨後塞歌亦逾河而割阿富汗之東境所謂疆場之邑一彼一此者耳西域聞見錄謂敖罕與溫都斯坦地界毗連各以威力相制迭爲強弱今攷與溫都斯坦爲鄰者阿富汗之外別無敖罕國

名蓋阿富汗一作愛烏罕愛烏合音近教遂誤以愛烏罕爲教罕而安集延之浩罕都城亦稱教罕一作豪罕又作霍罕

論者遂以此譏樞園之謬妄謂其移極北之回部於南方實則轉音之滑訛而不足深訛也又聞見錄云教罕之人種類不一有與內地回子相似者有與安集延相似者有與土爾扈特相似者有毛髮拳曲與義羅斯相似者又一種人亦回子衣帽鬚繞頰如喟而赤染以茜某人多力善用木矛西域人多畏之又一種人圓領大袖衣冠類漢唐貌清奇似朝鮮人或謂是後漢之遺種

云又云波罕西域之大國亦西域之亂邦詐力相尙日
日皆逐鹿之勢蓋自古而然

云

余攷西洋人地圖阿

富汗境土縱橫皆不過三千里幅員旣無莫大之勢種
族安得如許之繁蓋其國本波斯所分迨後由分而合
復由合而分西域不知波斯國名遂以波斯各部種類
並歸之阿富汗耳泰西人亦稱波斯客籍流寓種類甚
多語言不一有額力西者即西有阿丹者即阿有羅馬
者有土魯機者正與聞見錄所云相合至兩國再合再
分兵爭數起又復時時內訌迭相篡奪所云日日皆逐

鹿之勢殆不虛也

俾路芝

密羅既
忽魯謨斯

思布

北羅吉在阿富汗之南亦回部也東

接西印度西接波斯南臨印度海東西約一千七八百

里南北約六七百里岡奧重疊沙磧廣莫田土甚瘠僅

數耕食時序和平物產與阿富汗畧同國無王分六部

曰薩拉彎曰加支干達瓦曰倭拉彎曰盧斯曰美加蘭

曰古義斯丹六部各有酋長國小而強習於攻戰與英

吉利所屬之印度西部時時搆兵互有勝負

按俾路芝立國不知所自始明初鄭和等使西洋乃有

忽魯謨斯國名今四裔考之思布皆指俾路芝也

地里備考曰北羅吉國一作比路治國亞細亞州之中印度之西北極出地二十五度起至三十度止經線自東五十八度起至六十七度止東至塞哥新的亞二國西連白爾西亞國南接疴曼海灣北界阿付干國長約一千餘里寬約六百二十里地面積方約十萬餘里烟戶三兆餘口本國地勢岡陵重疊沙漠廣闊湖河甚小逢夏暑涸田土頗瘠樹林稀疎五穀百果僅敷所需各種鳥獸罔不充物土產金銀銅鐵錫鉛磬龍窩宅硫磺

礦砂花石茜草絲花等物地氣溫和四季相適至于朝
綱諸酋統轄各分部落所奉之教乃回教也技藝庸拙
貿易清淡通國分爲六部曰薩拉灣曰加支干達瓦曰
倭拉灣曰盧斯曰美加蘭曰古義斯丹

地球圖說皮路直坦國一作比路斯其酋亦號士丹猶
痕都之號斯坦也東界天竺國南界亞拉北亞海西界
白耳西亞國北界亞加業坦國其百姓約有二百萬之
數都城名基拉城內民二萬半述釋教半述回教其
風俗亦有不善遇財卽刲多居穹帳少瓦屋人尚規矩

又有不居於帳篷者卽不良之徒也嘉慶年間本與亞加業坦國爲一國後各自分析立主國內有極大之曠野有極峻之高山故少膏腴惟牧羊馬

地球圖說亞加業坦國東界天竺國南界皮路直坦國西界白耳西亞國北界大布加利亞國其百姓約有五百七十萬之數皆半述釋教半述回教以牧羊馬爲生南有曠野東南北復有高山惟中央平坦人民之狀與皮路直坦國相似風俗亦無異惜其民心不睦時相矛盾國王失柄不從其令心惟愚拙何異天竺之民也

地里備考曰布丹國一名廓爾喀國在亞細亞州印度西藏二國之間其國土自北極出地二十六度二十分起至二十九度止經線自東八十六度十分起至九十二度五十五分止東至亞桑國西連阿付干國南接榜加刺地方北界西藏國長約一千六百里寬約七百里山陵疊起人烟稠密田土肥饒湖河澗澤五穀百果鳥獸草木靡弗蕃衍絳花大黃黑金紋石寶爲豐盛地氣溫和所奉之教乃黃衣釋教人民勉貿易與隆通國分爲二大部一曰德白拉乍乃國都也一曰比斯尼

俄羅斯與印度搆兵記曰、印度海與後藏緬到曰鄰廓

爾喀介其中其孟阿臘東印度也孟邁南印度也其溫

都斯坦中印度也

溫都一作興都一作痕都卽印度之轉音

克阿彌爾古屬

賓愛烏罕吉大舟氏北印度也印度河兩岸巴社各回

國西印度也皆在葱嶺西南接中國西域近日英吉利

自稱管理五印度蓋惟北西印度未全爲所據其東南

中三印度則幾盡并之矣然康熙雍正間英夷僅據孟

阿臘孟邁二埠未窺印度全境而鄂羅斯方與普魯社

搆兵亦未南牧葱嶺西地中海東皆統於天方之回教

乾隆中西域甫平溫都斯坦尙與巴達克山構兵旋爲
愛烏罕所并嘉慶以來鄂羅斯由黃海攻服黑海各部
又沿裏海南侵葉夷亦并溫都斯坦泝恆河北上于是
葱嶺西除布哈爾愛烏罕諸大國外凡裏海游牧回部
號韃靼里者皆并於鄂羅斯夾恆河及南洋之城郭回
國半屬於英吉利裏海卽加士比唵海近於鹹海亦名
西洋人謂游牧之回高海明史謂游牧之蒙古曰韃靼
部曰韃靼皆音近英吉利及鄂羅斯二境中所隔數
國則愛烏罕爲大或稱阿付顏凡或曰甲布爾道光十
九年愛烏罕與沙蘇野相攻沙蘇野酋請救於英夷英

吉利遂起印度各部落之兵，并力攻破愛烏罕，愛烏罕之酋亦走憩于鄂羅斯。鄂羅斯復起駐防韃靼之兵，南攻巴社，取機洼，取木哈臘，欲恢復愛烏罕故地，以直攻印度。英吉利兵據險力拒，于是英鄂二邊境僅隔。興都哥士一大山，而血戰無虛日矣。興都卽印度二字音轉其山界北中二印度之間

愛烏罕國及沙蘇野部落皆在是山之南，機洼及木哈臘皆在是山之北，而沙蘇野之部落亦有軼出山北者，是爲英鄂交惡之由。與交兵之界，沙蘇野三以道光十八年爲愛烏罕所破，走投援印度。時英吉利鎮守印

度之大兵帥曰□□□副兵帥曰沙機尼遂于十九年七月起孟阿臘孟適溫都斯坦三部之兵使沙機尼將之而沙蘇野酋自以所部兵鄉導時愛烏罕酋自都於加模爾城遣其次子以兵三千五百守牙尼士城長子以兵數千守加布爾城牙尼士城本險固于其城門前復增重濠重牆守禦甚固英吉利軍先營近郊誘戰不出乃督馬礮軍駱駝礮軍步礮軍三路進攻此三軍謂以駱駝負礮以人扛礮也又開天礮擊之天礮者仰空發礮飛墮城中遂逼城而營并以兵扼加布爾援軍之路愛烏罕之

會遣其長子領千五百騎步兵三千由加布爾城赴援
夾攻後路爲沙蘇野部兵擊退次日遂會各營專攻城
門更番迭進城內兵亦死力鏖戰旣而天礮從空而下
城中震驚爭潰遁凡二晝夜拔其城擒其次子乘勝兩
路進攻加布爾城愛烏罕之酋同其長子率兵萬有三
千守格麻關而軍士奪氣望風解體父子率三百騎走
保麻緬棄芻糗火礮輜械山積英吉利遂據二城遣沙
蘇野王復國酌留歐羅巴兵溫都斯坦兵及愛烏罕新
降兵助守其地此英夷侵北印度之事也愛烏罕旣遁

麻緬則遣使乞師於鄂羅斯。鄂羅斯鎮守韃靼里之兵帥久豔東南印度之富，特隔于各回部。至是乘各部自閑謀由巴社以圖印度。巴社者，心國卽來粵貿易。

之白頭番，所謂港脚者也。小白頭爲溫都斯坦大白頭爲巴社。巴社雖不屬英吉利，而與英吉利睦，故英帥律屋蘭者以兵助巴社拒之。鄂羅斯復以收逃奴爲名，襲破機達及木哈臘二回部，又攻取沙蘇野所屬三部之在興都哥士山北者，遂駐兵荷薩士河與英吉利中印度接界，并使人習印度法律言語，又購木哈臘人鄉導。

無一日忘印度而英吉利亦嚴兵愛烏罕爲備議還舊
會于故地以息外構而增藩蔽議未定而廣東事起是
時欽差大臣赴廣東禁鴉煙罷互市聲其罪惡布
告諸國其佛蘭西彌利堅讐英夷者咸稱快廓爾喀亦
自駐藏大臣願率所部收東印度喀爲我全藏藩族而
與英吉利有隙道光十八九年間英吉利初擾廣東廓爾喀求
助之餉往攻第里入察大臣不知第里入察卽孟加刺也不許及英夷大擾江浙廓爾喀自以兵乘虛
攻之大有破獲英夷回救不及乃以所得中國銀百萬
贖其俘于鄂羅斯使臣亦自比革爾國都起程赴人以和

關約中國由緬甸西藏夾攻印度事雖未行而英夷則

惴惴甚或欲乘鄂國使臣未至速行入寇或料中國疑鄂羅斯更甚於疑他國未必遽信其言然南洋西洋聞罷市之信各埠茶葉大黃已不肯售踊貴價倍而英夷國中繳煙價龍關稅各缺銀千餘萬員諸銀肆復不出貸價復翔貴借貸鄰國數百萬充兵餉而彌利堅佛蘭西先後在粵請助兵船爲中國効力者屢見於粵中督撫及將軍章奏事則可徵也時則可乘也前廓爾喀記中以夷攻夷之議尙或迂之而不察故復述是篇而以

澳門探報附其後

臣源曰由近事溯之乾隆則準噶阿睦爾薩納之來投
請兵也盈廷喙拒獨高宗排羣議用之遂一戎衣
而定伊犁矣土爾扈特之棄鄂羅斯來附也盈廷喙拒
獨高宗排羣議受之并移檄鄂羅斯剖明曲直卒
盡臣瓦刺四大部矣由遠事溯之康熙則俄羅斯所部
東逼黑龍江聖祖附書荷蘭轉達鄂汗海道往還
半載得報遂擴索倫地數千里矣準噶爾請授兵六萬
于鄂羅斯聖祖移書宣示利害絕其糾約噶爾丹
敗無可投卒潰竄死矣聖祖籌運於廊廟之間而

指麾嗾使於數萬里之外豈不在識夷情洞敵勢哉西藏一陷於準噶爾再陷於廓爾喀彼時氣惡烟熾孰不畏道遠勞師而兩朝深維利害不惜深入撻伐恢域犁庭是以北攝準夷西震印度弈世而後尚有願效馳驅之廓夷夾攻印度之鄂部請助海艘之島國待我驅策同我敵愾故曰天下有道守在四夷此擊則彼應威立則令行事會之來間不容髮哉

附澳門月報

即所謂新聞紙

道光二十年七月澳門接印度五月十四日來信

卽中國四月十三日論及鄂羅斯欲攻打印度之事蓋我英

國之印度兵攻取興都哥士山

近巴社國

南邊各部落

而鄂羅斯邊境在此山之北三年前尙有回回四

五國亘隔英吉利與鄂羅斯屬國之間各遠數百

里今止隔一大山而已鄂羅斯近日直攻至韃韃

里之機洼

韃韃里謂游牧回部如哈薩克布鲁特之類東起葱嶺西至裏海南界印度北

界鄂羅斯皆是也機洼乃韃韃里南方部落

皆因我等攻取阿付顏尼

部

此部原屬巴社今爲英吉利所據在印皮之西巴社之東北韃韃里之南故鄂羅人

亦攻至荷薩士河

韃韃里地近機洼亦韃韃里南方

部落近阿同取阿付顏尼部以攻打印度爲我英
付顏尼

國兵頭沙阿力山及馬約里治堵禦故計不行鄂
羅斯前在希臘巴社國東方部落近阿付顏尼與巴社人立約欲

收服阿付顏尼以攻取印度亦因我兵頭律屋蘭
所拒巴社節白頭回國南抵海後詭稱收回逃散
西界都魯機北界韃韃里

奴僕突攻取機洼及木哈臘人皆謂鄂羅斯旣得
此二地當必退兵乃又日日使人學習印度事務
又與木哈臘人立約同取阿付顏尼不知鄂羅斯
人要到何地方肯住手現聞鄂羅斯使者已自比

特革起程由韃韃里到中國

此韃韃里謂廓爾喀蒙古蓋凡各游牧部

皆謂之必懲慮中國人與英國人爭鬪并欲得韃韃也

北京出 諭與緬甸人使引來攻擊不知何時使臣能到得 北京我等切不可閉目不理

鄂羅斯人曾以兵威自黃海攻至黑海一帶地方

以廣其國境所以今日必要隄防其在荷薩土河

駐札之兵前來攻擊倘我將阿付顏尼防兵撤回

則鄂羅斯人必帶領木哈臘之兵同攻阿付顏尼

矣我等今年若將阿付顏尼王復立於加模爾城

阿付顏尼舊部卽應帶兵過興都哥士大山取回沙蘇野
所失去之三部落一曰袞都斯、一曰麻爾格、一曰模特散皆在阿付顏尼之北木
哈臘然之南我兵到彼必定遇鄂羅斯兵與木哈臘兵
約會夾攻我兵我兵恐卽擾亂而回亦或與鄂羅
斯人相持大抵英鄂二國在阿細亞洲交戰之事
不久卽至我等宜先預備出兵矣

南印度各國

南印度地毗連印度海地形如箕海中東南一島名曰
錫蘭東南西三面距海北距中印度西爲孟邁一作孟
孟買

邁之西海中有島曰檳榔嶼卽新埠也其餘小島星布皆無大於此者

海國聞見錄曰小白頭南入于海之地曰戈什峽東西三面皆臨大海爲大西洋各國市埠所環據戈什峽東面沿海地名有三曰網礁腦則英機黎埔頭也曰房低者里則佛蘭西埔也曰泥顏八達則荷蘭埔頭也其西面沿海地名有二曰蘇喇曰網買則英機黎埔頭其地俱紅毛所建置此外又懸一島曰西侖大珠卽錫蘭山也此皆南天竺地

海錄曼達喇薩在明呀喇西少南由葛支里沿海陸行
約二十餘日水路順東風約五六日俱英吉利所轄地
至此別爲一都會有城郭英吉利居此者亦有萬人敘
跋兵二三萬此地客商多阿里敏番卽來粵東戴三角
帽者是也土番名雪那裡風俗與明呀哩畧同土產珊瑚
珍珠鑽石銀銅絲花詞子乳香沒藥鴉片魚翅假梭
矛梭矛形如小洋狗又有金邊洋布價極貴一匹有值
洋銀八十枚者內山爲喚包補番喚包補者猶華言大
也本回回種類其間國名甚多疆域不過數百里所織

布極精細大西洋各國番多用之。笨支里在曼達喇薩西南爲佛郎機所轄地由曼達喇薩陸行約四五日水行約日餘卽到土產海參魚翅訶子棉花獵梭豸內山亦屬曉包補。尼古叭當國在笨支里西嶺界中疆域甚小土番名耀亞。西嶺在笨支里少北又名古魯慕由笨支里水路約六七日陸路約二旬可到爲荷蘭所轄地土番名高車子風俗與明呀里畧同內山爲乃弩王國土產海參魚翅棉花蘇合油海參生海中石上其下有肉盤盤中生短帝蒂末卽生海參或黑或赤各

肖其盤之色豎立海水中隨潮搖動盤邊三面生三鬚
各長數尺浮沉水面探者以鉤斷其蒂撈起剖之去其
穢煮熟然後以火焙乾各國俱有唯大西洋諸國不產
○達冷莽柯國在西嶺西北順東南風約二三日可到
疆域甚小民極貧窮然性頗淳良風俗與上畧同屬邑
有地名珈補者西洋客商皆居此土產海參魚翅龍涎
香訶子○亞英加在加補西北順風約五六日可到爲
英吉利所轄地土番風俗與上畧同土產棉花燕窩椰
子訶子又曰固貞在亞英加西北水路順風約日餘可

到爲荷蘭所轄地土番風俗與上畧同內山爲晏得尼
加國寶回回種類土產乳香沒藥魚翅棉花椰子蘇合
油血竭砂仁詞子大楓子○隔瀝骨底國在固貞北少
西水路順風約二日可到陸路亦通風俗與上同土產
胡椒棉花椰子俱運至固貞售賣內山仍屬晏得尼加
○馬英在隔瀝骨底北少西水路順風約二日可到爲
佛郎機所轄地土產風俗與上畧同內山亦屬晏得尼
加達拉豬在馬英西北陸路相去約數十里爲英吉利
所轄地土番風俗亦與上同土產胡椒海參魚翅淡菜

內山仍屬安得尼加。馬喇他國此與孟加臘音近地
度也。毋在達拉豬西。疆域自東南至西北長數千里。沿
海邊地分爲三國。一小葡萄一孟婆羅一麻倫尼。爲回
回種類。凡拜廟廟中不設主像。唯于地上作三級。取各
花瓣徧撒其上。羣向而拜。或中間立一木椎。每月初三
各于所居門外向月念經。合掌跪拜稽首。土產棉花胡
椒魚翅鴉片。小葡萄在馬喇他東南沿海邊界。由達
拉豬向北少西行。經馬喇他境。約六七日到此。爲葡萄
亞國所轄。地彊域約數百里。土番奉蛇爲神。婚嫁與明

呀里同死則葬于土每年五月男女俱浴于河延番僧坐河邊女人將起必以兩手掬水洗僧足僧則念咒取水蘸女面然後穿衣起又有蘇都魯番察里多番古魯米番三種多孟婆羅國人西洋人居此者有二萬人士產檀香魚翅珊瑚犀角象牙鮑魚等有西洋太醫院隨船至此聞其妻死特遣土番齋札回大西洋祖家請于國王以半俸給其家養兒女是知此地亦有陸路可通大西洋也○孟婆羅國在小葡萄北山中由小西洋水路順風約日餘可至國境王都在山

中以竹爲城疆域亦數百里風俗與小西洋同土產檀
香犀角○麻倫尼國在孟婆羅北水路順風約日餘可
到疆域風俗與孟婆羅同土產海參魚翅鮑魚二國所
產貨物多運至小西洋埠頭售賣○蓋凡里國在麻倫
尼北少西水路順風一二日可到疆域風俗與小葡萄
畧同土產洋葱其頭寸餘熟食味極清酣瑪瑙棉花鴉
片內山亦屬曉包補自曼達喇薩至郎杜土番多不食
豕牛羊犬唯食鷄鳴魚蝦男女俱戴耳環○孟買在蓋
凡里北少西相去約數十里爲英吉利所轄地有城郭

土番名叭史顏色稍白性極滄良家多饒裕英吉利鎮此地者數千里土產瑪瑙大葱棉花阿魏乳香沒藥魚膏魚翅鴉片番覲棉花最多亦南洋一大市鎮也鄰近馬喇他益几里曉包補卽杜諸國多輦載貨物到此貿易其內山亦屬曉包補。蘇辣在孟買北水路約三日可到亦英吉利所轄土番名阿里敏土產同上○淡項讀平在蘇辣北水路約日餘可到爲葡萄亞所轄土產同孟買○卽杜國在淡項北疆域稍大由淡項水路順風約二日可到風俗民情與益几里諸國畧同土產鴉

凡海參魚翅俱運往蘇辣孟買販賣自明牙喇至此西
洋人謂之戈什峽總稱爲印度海土人多以白布纏頭
所謂白頭回也遇主及官長蹲身合掌上手額俟王及
官長過然後起子見父母亦合掌于額平等亦如之其
來中國貿易俱附英吉利船本土船從無至中國中國
船亦無至小西洋各國者自此以西海波洶湧一望萬
里舟楫不通淺深莫測沿海諸國不可得而紀矣其卽
杜內山則爲金眼回國開其疆域極大不與諸國相
往來故其風俗土產亦不可得而紀也

案金眼回回在
南印度山內當

是中印度之奠
爾白頭回國也

萬國地理全圖集曰馬塔刺南印度之省會也形勢在
北極十三度五分偏東八十度二十一分海邊浪湧濤
鳴上岸甚險建城于沙坦居民四十萬餘丁土人面黑
而肢骸趨捷能翻飛作劇富戶耗費銀錢造廟造像信
佛奉神不悟天主正教英國建礮臺保障防禦其屋建
於園裡美花香草芳芬漚鑿佛蘭西軍屢次攻擊英臺
雖然獲勝後亦必退此時英權穩立如磐斷難動移馬
塔刺之南爲本地治利城乾隆間爲佛蘭西守據挑唆

土民肇釁驅英但東得西失惟留本城而已此省內所
有大城如左班牙樂礮臺堅固街衢廣麗內有古王宮
殿被英軍所攻敗者北刺利建在山頂係要隘欲上山
嶺惟有一路防兵乘險開礮無敵敢近撤林居民織造
布帛又製火硝骨他巴係罪犯徒流之邑骨他羅利邑
屋宇美街衢廣西令牙巴坦昔係王都銳意欲驅英民
出印度所募民壯軍士不勝其數因英國之兵奪險偏
城效死力戰土王戰敗和銀一千萬兩割其國三分之
一以免剿滅於嘉慶三年再開釁隙王募四十萬軍士

立心力戰於是英國軍士圍攻城池闖入城內其王被
兵刺死遂奪全地爲英屬國

又曰網買在南印度之西邊海濱之左昔屬葡萄牙此
時歸英建立省會因潮水高漲掘築船廠建造戰艦其
房屋甚美其人貴白頭回惟利是圖拜日祀火不葬其
屍以供鷹食恒時買賣獲益亦好布施厚賙濟故令天
下庶民景仰之也○鄰地豐產棉花大半運赴中國亦
有胡椒椰子珊瑚等貨海船至大者載二萬二千五百
石入水甚深每年進黃浦厚運貨物省會形勢在北極

十八度五十六分偏東七十二度五十七分天氣熱昔時英人不服水土此時已經開墾安居無恙其居民共計一十七萬丁內有白頭一萬三千日前日地磽人貧今廣開通商之路每年運出物價幾百萬兩日增裕富網買之北蘇刺城昔大興盛此際漸衰城內有禽獸院養各類老犬老牛亞麥犬八邑乃回回之城居民有十萬丁因地震倒壞屋宇所損不可勝計坤拿城嘉慶年間乃馬刺他之雄都四圍山嶺築建堡臺以防禦國敵英國攻取各臺驅其人而據其地。網買之南有葡

葛藩屬國曰俄亞者長二百二十里闊六十里於明正德五年攻取其地建城保障脅服鄰國立廟造寺養僧無算不久速廢今所留之地物產不多生意亦少○昔荷蘭據海邊之城如可陳等處互市貿易現已割予英人是以沿海各地方大半英人所轄

地里備考曰馬爾地瓦斯國一曰錫蘭山在亞細亞州之南居印度海中北極出地十五分起至七度二十分止經線自東七十度三十分起至七十一度三十分止周圍枕海地不相連環以各島共一千五百座四面相

向自南而北約二千里其烟戶所在惟四五十島地氣溫和寒暑相稱田土不澤龍畝稀疎穀果甚鮮椰子木多海出鼈龍土產珊瑚玳瑁等物商船絡繹王位相傳所奉之教乃回教也國都在馬劣島中乃通國之首島

外國史畧錫蘭山島在印度東南廣袤方圓千一百六十二里居民一百四萬五千六百口北極出地自五度五十六分及九度四十六分偏東自七十九度三十六分及八十一度五十八分地高於海自八十丈及三百丈最高之峯五百處其一日亞坦之峰有石上足痕或

曰佛足蹟焉西北地低港汊皆流入之夾以最深之海
港地形如箕舌時有甘雨地氣常如春時絕不似印度
尤熱地多礲產桂皮加非椰子海邊尤豐居人榨其油
市與外國土人用象如牛馬多嫩黃青藍各色美玉海
產明珠每年約值銀二十萬兩內地多出鹽但五穀不
登必買于印度居民有三種一爲內地之干地人土民
多由五印度來半奉耶穌教餘則拜佛錫蘭島自古有
名珍奇鍾萃號爲寶渚時有中國大商艘赴島貿易亞
西亞各國皆于是港通商明時回回族類由亞拉國來

侵據此島孝宗宏治年與葡萄牙兵船結盟歲貢肉桂皮協力驅亞拉回人遂爲葡萄牙所據勸士民奉天主教崇禎四年干地王招荷蘭助驅葡萄牙而荷蘭復奪海邊各地開埠越百三十年嘉慶元年又爲英人攻據自後全島歸英國每年納餉約百萬尚不足供官費然貿易日興所種珈琲樹每年增至數萬石開道院勸民奉耶穌教○其都城曰可倫破在西南海邊居民六萬築礮臺以護之內設大礮三百門干地山水甚美高海面者六百餘丈前與北地未通欲攻擊其酷主不能進

此時開通路輻輳不絕貿易日興其海口曰可道丁馬里又牙利城東南之堅城

又曰馬地威羣島約百八十里偏東七十二度四十八分並七十三度四十八分產珊瑚有沙石亦出椰子粟多沙魚居民勤勞年年將椰油鹹魚貝子玳瑁穀等貨赴印度市以易鐵器布沙餧百姓馴樸今皆遵天主教○臘其地威十七島偏東自七十二度至七十四度北極出地自十度至十二度惟八洲有居民種椰子爲飲食民甚貧乏○尼哥巴羣島在印度西海中北極出地

在七度產木料其烟瘴各島多出椰子檳榔海出蛤蜑
螃蟹海參香涎等物居民惰逸耶鯀之徒教化之大尼國
在此開埠因瘟疫皆斃道光二十六年再開埠○大尼
之北爲安他曼羣島土蠻未向化居草寮食魚蠟泥身
不衣然善用弓箭互相殺戮其林箐內有紅黑香木但
烟瘴太重乾隆五十四年英國人在此開埠旋退去後
或有船抵此甫及岸其士民卽突出攻擊